



Fidoyilik —
Vatanga xizmat demak!

2024-yil 12-oktabr, shanba,
118 (23.995)-son

**KUN
HIKMATI**

Odob-axloq
qoidalariga
to'g'ri
kelmaydigan
harakat ham,
fikr ham aybdir

Zarafshon

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz

↓ Prezident farmoniga ko'ra

1,5 million aholi kambag'allikdan chiqariladi

Bu Prezidentning "Kambag'allikni qisqartirish va aholi turmush farovonligini oshirish borasidagi chora-tadbirlarni yangi bosqichga olib chiqish to'g'risida"gi farmonida belgilangan.

Farmonga ko'ra, 2024-yilning qolgan davrida 500 ming, 2025-yilda 1 million nafar aholini kambag'allikdan chiqarish davlat ijtimoiy-iqtisodiy siyosatining hamda barcha darajadagi davlat organlari va tashkilotlarining birinchi darajali vazifasi etib belgilandi.

Ayni maqsadda "Kambag'allikdan farovonlik sari" dasturi amalga oshiriladi hamda dasturni amalga oshirish bo'yicha respublika komissiyasi tashkil etiladi.

2024-yil 1-dekabrda "mahalla yettilligi" tomonidan kambag'al oilalarning ijtimoiy sharoiti va kambag'allikka tushish sabablarini o'rganish natijasida ijtimoiy himoya milliy agentligi tomonidan Kambag'al oilalar reyestri shakllantiriladi.

2025-yil 1-yanvardan boshlab:

a) kam ta'minlangan oilalar bolalari uchun nafaqa va moddiy yordam olayotgan oilalarning rasmiy band bo'lmagan a'zolari ishga joylashganda, o'zini o'zi band qilganda yoki tadbirkorlik faoliyatini yo'lga qo'yganda, ushbu nafaqa va moddiy yordamni ularning muddati tugagunga qadar, biroq 6 oydan ko'p bo'lmagan muddatga to'lash davom ettiriladi;

b) mehnatga haq to'lashning eng kam miqdorining 1,5 baravaridan kam bo'lmagan oylik ish haqi to'langan holda ishga joylashgan Kambag'al oilalar reyestriga kiritilgan oila a'zosi uchun ijtimoiy soliq uch yil davomida 1 foiz stavkada to'lanadi;

v) kambag'al oilalarga ko'mak choralarini ijtimoiy shartnoma asosida mehnatga layoqatli oila a'zolarining bandligini ta'minlash, o'z tomorqasidan samarali foydalanish (ekin ekish), oila a'zolari, shu jumladan, farzandlarining bilim olishi, kasb-hunar va xorijiy tillarni o'rganishi hamda sog'lig'ini nazoratga olishi, uy-joyini ozoda tutishi kabi shartlar inobatga olingan holda ko'rsatiladi.

Bunda ijtimoiy shartnoma shartlari bajarilmagan taqdirda, ijtimoiy yordam va xizmatlar (ijtimoiy nafaqadan tashqari) ko'rsatish to'xtatiladi.

Saylovga tayyorgarlik jarayonlari kuzatildi



Markaziy saylov komissiyasi raisi Zayniddin Nizomxo'jayev viloyati-mizda bo'lib, saylovga tayyorgarlik jarayonlari bilan tanishdi.

Jumladan, Markaziy saylov komissiyasi raisi Samarqand shahridagi 73-saylov uchastkasida komissiya a'zolari va saylovchilar uchun yaratilgan sharoitlarni ko'zdan kechirdi. Komissiya a'zolari bilan suhbatlashdi.

1073 nafar saylovchi ovoz beradigan mazkur uchastkada ayni paytda saylovga tayyorgarlik ishlari qizg'in olib borilmoqda. Saylovga oid ma'lumotlar joylashtirilgan, barcha zarur jihozlar yetkazib berilgan.

Z.Nizomxo'jayev Samarqand shahridagi uchastka saylov komissiyalari a'zolari uchun tashkil etilgan seminar qatnashdi. O'quv seminar ishtirokchilariga bu yilgi saylovlarning o'ziga xos xususiyatlari haqida tushuncha berdi.

Samarqand viloyatiga safari davomida Z.Nizomxo'jayev viloyat hududiy saylov komissiyasi faoliyati bilan ham tanishib, komissiya a'zolari bilan muloqot qildi. Suhbat davomida bu yil parlament quyi palatasiga ilk bor aralash saylov tizimi asosida saylov o'tkazilayotgani, saylovga oid qonunchilikdagi o'zgarishlar haqida so'z yuritildi.

Viloyat hududiy saylov komissiyasi matbuot markazi.

Daholikka erishgan buyuk olim, mashhur davlat arbobi

↓ Xalqaro anjuman

10-11-oktabr kunlari Samarqandda "Mirzo Ulug'bek: buyuk qomusiy olim va mashhur davlat arbobi" mavzusidagi xalqaro konferensiya o'tkazildi.

Davlatimiz rahbarining shu yil 12-sentabrdagi qaroriga ko'ra, yurtimizda buyuk qomusiy olim va mashhur davlat arbobi Mirzo Ulug'bek tavalludining 630 yilligi keng nishonlanmoqda.

Mazkur qaror ijrosi yuzasidan Oliy ta'lim, fan va innovatsiyalar vazirligi, O'zbekiston Fanlar akademiyasi va viloyat hokimligi tomonidan tashkil etilgan mazkur anjuman qatnashchilari dastlab Mirzo Ulug'bek rasadxonasida bo'lib, ulug' alloma haykali poyiga gullar qo'ydilar.

Sharof Rashidov nomidagi Samarqand davlat universitetida konferensiyaning ochilish marosimi o'tkazildi. O'zbekiston Fanlar akademiyasi vitse-prezidenti B.Abdulhalimov, Oliy ta'lim, fan va innovatsiyalar vaziri birinchi o'rinbosari O.Mahkamov, Samarqand davlat universiteti rektori R.Xolmurodov, viloyat hokimi o'rinbosari H.To'xtayev va boshqalar mazkur anjumaning o'z davrida Amir Temur va uning nabirasi Mirzo Ulug'bek tomonidan dunyoning yirik ilm-ma'rifat markazlaridan biriga aylantirilgan Samarqandda, ulug' astronom olim tashkil etgan madrasai oliyaning vorisi hisoblangan Samarqand davlat universitetida tashkil etilishi chuqur ramziy ma'noga egaligini ta'kidladilar.

– Insoniyat tarixida ko'p kashfiyotlar qilgan, o'z ilmi bilan odamlar turmush tarzi o'zgarishiga hissa qo'shgan olimlar bor, lekin ularning hammasi ham daholikka erishgan bo'lmagan, – deydi O'zbekiston Fanlar akademiyasi Astronomiya instituti direktori, akademik Shuhrat Egamberdiyev. – Buyuk astronom Mirzo Ulug'bek bobomiz esa dunyo ilm ahli tomonidan daho sifatida e'tirof etilgan olimlardan biriki, bundan har qancha faxrlansak arziydi. Shuning uchun bugungi xalqaro anjumanda bir qator xalqaro tashkilotlar, dunyoga



mashhur nufuzli universitetlar vakillari, taniqli astronom olimlar ishtirok etmoqda.

Konferensiyaning ochilish marosimida Fransiyadagi Temuriylar tarixi va san'atini o'rganish assotsiatsiyasi rahbari Federik Bressand xonim onlayn ishtirok etib, u boshchiligidagi jamiyatning Yevropa davlatlari, xususan, Fransiyada Mirzo Ulug'bek merosini o'rganish borasida amalga oshirayotgan ishlari va kelgusi rejalari haqida ma'lumot berdi.

Mazkur assotsiatsiya tashabbusi bilan Fransiya va O'zbekistondagi teatr aktyorlari hamkorligida yaratilgan "Mirzo Ulug'bek" spektaklidan lavhalar namoyish etildi.

Shundan so'ng Mirzo Ulug'bek tavalludining 630 yilligi munosabati bilan nashr etilgan buyuk munajjimning "Zij jadedi Ko'ragoniy" va "To'rt ulus tarixi" asarlarining bir necha tildagi yangi nashrlari taqdimoti o'tkazildi.

Abu Rayhon Beruniy nomidagi Sharqshunoslik instituti sharq xalqlari fani va madaniyati tarixi bo'limi mudiri, yirik sharqshunos olim, "Zij jadedi Ko'ragoniy" asari tarjimoni Ashraf Ahmedov mazkur asar va uning tarjima jarayonlari haqida gapirib berdi.

– "Zij" Mirzo Ulug'bekning shoh asari bo'lib, undan

keyingi fundamental bilimlar rivojiga salmoqli hissa qo'shgan, – dedi A.Ahmedov. – Mazkur asar o'z tarkibiga ko'ra, VIII-IX asrlarda boshlangan astronomik an'anani davom ettirsa ham ilmiy darajasi ularga nisbatan beqiyos va balanddir. Men 1974-yilda ushbu asar tarjimasini ustida ish boshlaganman. 20 yil davomida shu ish bilan shug'ullandim. Dastlab asarni rus tiliga o'g'irgan bo'lsam, keyin o'zbekcha tarjima qilishga muvaffaq bo'ldim. To'rt kitobdan iborat asar ilk bor to'liqligicha o'zbek tiliga tarjima qilindi. Bu bizning bebaho ilmiy boyligimizdir.

Anjuman "Sharq astronomiyasida homiylik va homiylik", "Mirzo Ulug'bek davrida ilmiy va ma'naviy hayot" shu'balarda o'z ishini davom ettirdi. Ushbu sessiyalarda Mirzo Ulug'bekning astronomiya ilmi rivojiga qo'shgan hisssasi, yaratgan asarlariga oid so'nggi tadqiqotlar natijalari, ilmiy yangiliklar, o'sha davr ilmiy va madaniy hayotiga doir, shuningdek, ulug' alloma shogirdlarining faoliyatiga bag'ishlangan ma'ruzalar, taqdimotlar bilan birga, Sharq mamlakatlari va Yevropa davlatlarida astronomiya fani taraqqiyoti va bunda xalqaro hamkorlik masalalariga alohida e'tibor qaratildi.

Ona tabiatni birgalikda asraylik!



O'zbekiston Ekologik partiyasi viloyat tashkiloti xodimlari, ekofaol yoshlar Samarqand shahrining diqqatga sazovor joylarida targ'ibot tadbirlarini uyushqoqlik bilan o'tkazishmoqda.

Shunday tadbirlardan biri Samarqand shahrining "Makon mall" savdo majmui hududida bo'lib o'tdi.

Tadbirda davomida targ'ibotchilar partiyaning saylovoldi dasturidan o'rin olgan jamoat transportini elektrobuslar hisobidan rivojlantirish, 10 yoshdan katta daraxtlarni ko'chirib o'tkazishni taqiqlash, seysmik holatlarni hisobga olib, ko'p qavatli uylar va ijtimoiy soha obyektlarini qurish talablarini kuchaytirish xususidagi dolzarb vazifalarni tushuntirishdi.

Partiyadan Oliy Majlis Qonunchilik palatasi va mahalliy kengashlar deputatligiga ko'rsatilgan nomzodlar aholi gavjum joylar, bezoralar va savdo majmualari, mahallalarda bo'lib, saylovchilar bilan uchrashmoqda va ularga o'z dasturlari haqida batafsil ma'lumot bermoqda.

Jumladan, Oliy Majlis Qonunchilik palatasiga nomzod Bahora Ergashova o'z saylov okrugidagi saylovchilarni dasturi bilan tanishtirdi. Ularning savollariga batafsil javob berdi. Saylovchilar O'zbekiston Ekologik partiyasining saylovoldi dasturi haqida bilimlarga ega bo'lishdi.

Ekologik partiya viloyat kengashi matbuot xizmati.

Har bir inson farovonligi uchun!



Samarqand shahridagi Azizon mahallasida xalq deputatlari viloyat Kengashi deputatligiga O'zbekiston Xalq demokratik partiyasidan nomzodi ko'rsatilgan Badriddin Nasriyevning saylovoldi uchrashuvi bo'lib o'tdi.

Uchrashuvda deputatlikka nomzodning ishonchli vakili Farog'at Shokirova B.Nasriyev tarjimai holi va maqsad-vazifalariga to'xtaldi. Har bir inson farovonligi, jamiyatimiz ravnaqi yo'lida kurashayotgan partiyaning saylovoldi dasturini va partiyadan ko'rsatilgan nomzodni qo'llab-quvvatlashga chaqirdi.

Tadbirda nomzod partiyaning saylovoldi dasturida belgilangan vazifalar haqida atroflicha so'z yuritib, davlat va jamiyatni rivojlantirish, huquqlar va imkoniyatlar tengligini ta'minlash, kuchli ijtimoiy siyosat yuritishga oid ko'plab taklif va tashabbuslar ilgari surilganini ta'kidladi.

Partiya o'z dasturiy maqsadlarga erishish yo'lida keyingi besh yillik uchun 10 ta yo'nalish, 15 ta strategik qadamdan iborat ustuvor vazifalar belgilab olingani ta'kidlandi.

Saylovchilar nomzodning saylovoldi dasturini ma'qullab, dasturda belgilangan rejalar yuzasidan o'z fikr va mulohazalarini bildirdilar.

XDP viloyat kengashi matbuot xizmati.

Urgut tumanida targ'ibot punkti tashkil etildi

↓ Saylov – 2024



O'zbekiston "Adolat" sotsial-demokratik partiyasi saylovoldi tashviqoti tadbirlarini «Teng imkoniyatlar va adolatli jamiyat sari!» shiori ostidagi xalqchil va adolatli dasturlar orqali saylovchilarning ishonchini oshirish, ularni mamlakat rivojiga munosib hissa qo'shishga qaratilgan muhim tashabbuslari bilan olib bormoqda. Buning natijasi o'Iroq aholi gavjum joylarda tashkil etilayotgan targ'ibot punktlari ishi o'z samarasini bermoqda.

Jumladan, partiyaning Urgut tumani kengashi tomonidan tuman tibbiyot birlashmasi bog'ida tashkil etilgan tashviqot tadbirida Oliy Majlis Qonunchilik palatasi deputatligiga nomzod Mahina Ahrorova hamda partiya Urgut tumani kengashi raisi Zamira Abduraxmonova partiya saylovoldi dasturining mazmun-mohiyati va xalq manfaatlariga xizmat qiladigan tashabbuslari haqida ma'lumot berdi.

Tashviqot tadbiri davomida partiyaning «Yosh adolatchilar qanoti» va «Ayollar qanoti» faollari tomonidan aholi vakillariga partiyaning va nomzodlarning saylovoldi dasturi tarqatildi.

"Adolat" SDP viloyat kengashi matbuot xizmati.

